

VENDIM
Nr.580, datë 10.9.2004

PËR FUSHËN E VEPRIMTARISË SË MINISTRISË SË INTEGRIMIT EUROPIAN

Në mbështetje të nenit 100 të Kushtetutës dhe të nenit 7 të ligjit nr.9000, datë 31.1.2003 "Për organizimin dhe funksionimin e Këshillit të Ministrave", me propozimin e Ministrit të Integrimit European, Këshilli i Ministrave

VENDOSI:

1. Ministria e Integrimit European ka për mision drejtimin teknik dhe bashkërendimin e procesit të integrimit të Republikës së Shqipërisë në Bashkimin European, nëpërmjet përafrimit të legjislacionit vendas me atë të Bashkimit European, hartimit të politikave të integrimit, bashkërendimit të ndihmave financiare dhe informimit të publikut për këtë proces.

2. Ministria e Integrimit European ushtron këto veprimtari:

a) Bashkërendon punën dhe monitoron përgatitjet e institucioneve shqiptare dhe angazhimet e ndërmarra prej tyre, në kuadër të procesit të stabilizim-asocimit;

b) Bashkërendon, monitoron dhe raporton për zbatimin e rekomandimeve të Komisionit European, të dala nga takimet e përbashkëta me Bashkimin European, në nivele të ndryshme;

c) Përgatit mekanizmat metodologjikë në funksion të lehtësimit të zbatimit të reformave sektorale, që rrjedhin nga negocimi dhe zbatimi i marrëveshjes së stabilizim-asocimit;

ç) Bashkërendon punën ndërmjet ministrive të linjës dhe institucioneve të tjera qendrore për hartimin e planeve kombëtare për partneritetin european, me qëllim realizimin e objektivave të përcaktuar në kuadër të procesit të integrimit european;

d) Bashkërendon, monitoron dhe analizon ecurinë e procesit të përafrimit të legjislacionit vendas me atë të Bashkimit European, duke mbajtur lidhje të rregullta institucionale me ministrinë e linjës dhe institucionet e tjera qendrore;

dh) Harton, në bashkëpunim me ministrinë e linjës dhe institucionet e tjera qendrore, planin kombëtar për përafrimin e legjislacionit shqiptar me atë të Bashkimit European, si dhe kontrollon zbatimin e këtij plani dhe të programeve të tjera të lidhura me partneritetin european;

e) Vlerëson përputhshmërinë e projekteve normative të propozuara nga ministrinë e linjës dhe institucionet e tjera qendrore me të drejtën e Bashkimit European, të cilat duhet të pasqyrojnë në relacionin shoqërues, shkallën e përafrimit dhe referencat për legjislacionin përkatës dhe jurisprudencën e Komunitetit European;

ë) Bashkërendon punën dhe ndihmon ministrinë e linjës dhe institucionet e tjera qendrore për hartimin e legjislacionit të nevojshëm, me qëllim përmbushjen e detyrimeve, që rrjedhin nga marrëveshja e stabilizim-asocimit;

f) Konfirmon përkthimin e dokumentacionit bazë, të nevojshëm për procesin e përafrimit të legjislacionit vendas me atë të Bashkimit European;

g) Bashkërendon, programon dhe monitoron ndihmën komunitare për Republikën e Shqipërisë (programi CARDS, programi i fqinjësisë, TAIEK, si dhe programe të tjera ndihme, që mund t'i ofrohen Republikës së Shqipërisë), sipas përparësive të vendit tonë, në kuadër të procesit të integrimit european;

gj) Përgatit dhe ndjek nënshkrimin e marrëveshjeve të ndihmave financiare të Bashkimit European për Republikën e Shqipërisë, në kuadër të programeve të përcaktuara në shkronjën "g" të kësaj pike;

h) Udhëheq dhe bashkërendon punën e ministrive të linjës dhe të institucioneve të tjera qendrore në përgatitjen e projekteve parësore dhe, në kuadër të programeve të përcaktuara në shkronjën "g", ia paraqet për mbështetje financiare Bashkimit European;

i) Merr pjesë në veprimtarinë e grupeve të punës, të ngritura nga institucione të tjera shtetërore, për hartimin e programeve të ndryshme për integrimin e Republikës së Shqipërisë në Bashkimin European;

j) Shkëmben të dhëna dhe organizon takime periodike, në nivel kombëtar, rajonal dhe ndërkombëtar, në funksion të procesit të integrimit european.

3. Ministria e Integrimit European në marrëdhëniet me të tretët:

a) bashkërendon hartimin dhe zbatimin e programit për informimin e publikut për çështjet e integrimit european;

b) propozon ngritjen e grupeve teknike të punës, në funksion të përmbushjes së detyrimeve, që rrjedhin nga procesi i integrimit european;

c) kërkon nga ministrinë e linjës dhe institutionet qendrore përgatitjen dhe paraqitjen në afate të caktuara të dokumenteve, në funksion të procesit të integrimit european;

ç) njofton organet përkatëse të Bashkimit European për përafrimin e akteve normative vendase me të drejtën e Bashkimit European;

d) përgatit dhe paraqet raporte për procesin e integrimit european në Komitetin Ndërmintor të Integrimit;

dh) informon komisionet e Kuvendit të Republikës së Shqipërisë, të interesuara për procesin e integrimit european, në përmbushje të detyrimeve kushtetuese.

4. Mënyra e komunikimit të Ministrisë së Integrimit European me misionin shqiptar pranë Bashkimit European të rregullohet nëpërmjet një udhëzimi të përbashkët të Ministrit të Punëve të Jashtme dhe të Ministrit të Integrimit European.

Ky vendim hyn në fuqi pas botimit në Fletoren Zyrtare.

KRYEMINISTRI

Fatos Nano